

**共同經課-1 約珥書二章二十一節~二十七節**

21 地土 ah，莫得驚，tiòh 歡喜快樂；因為耶和華行大事。22 田野 ê 走獸 ah，莫得驚，因為曠野 ê 草場發生，樹結伊 ê 果子，無花果樹、葡萄樹，亦 lóng 結實。23 錫安 ê 百姓 ah，lín tiòh 快樂，ūi 耶和華 lín ê 上帝來歡喜；因為祂用前 ê 雨及時賞賜 lín；為 tiòh lín 落雨水，就是前 ê 雨，後 ê 雨，kap 以前一樣。24 五穀場 beh 有麥滿滿，窟中 ê 新酒 kap 油 beh 滿出來。25 我差到 lín 中間 ê 大軍隊，就是第一種、第二種、第三種、第四種 ê 草蟲，所食 hiah-ê 年冬，我 lóng beh 還 lín。26 Lín beh 食來知足；亦 beh o-ló lín ê 上帝耶和華 ê 名；因為祂為 tiòh lín 行奇妙 ê 事，我 ê 百姓的確永遠無見笑。27 Lín 就 beh 知我 tī 以色列 ê 中間，koh 知我是耶和華 lín ê 上帝，以外無別 ê；我 ê 百姓的確永遠無見笑。

**共同經課-2 詩篇一百二十六篇**

1 上崎 á ê 詩。1) 耶和華 chhoā hiah-ê 受掠 ê 人 tò-tng 來錫安； Hit 時咱親像眠夢。2 Hit 時咱 ê 嘴 hah-hah 笑，咱 ê 舌出大歡喜 ê 聲；外邦中就有人講，耶和華為 in 行大事。3 耶和華有為咱行大事，咱就歡喜。4 耶和華 ah，求你 hō 阮受掠 ê 人 tò-tng，親像南方 ê 溪水 koh lâu。5 流目屎也種子 ê，Beh 出歡喜 ê 聲收割。6 Hit-ê 流目屎帶種子出去 ê，的確 beh 帶伊 ê 稻把歡歡喜喜 tò 來。

**共同經課-3 提摩太前書二章一節~七節**

1 所以我所勸勉 ê，第一就是替眾人懇求、祈禱、求恩、祝謝；2 替 chiah-ê 王 kap lóng 總 ê 官府求；hō 咱凡事敬虔端莊，thang 安然恬靜來過日。3 這是好，koh 得 tiòh 接納 tī 救咱 ê 上帝 ê 面前；4 伊 ài 眾人得 tiòh 救，也深知真理。5 因為上帝是一個，上帝 kap 人 ê 中間中保也是一個，就是做人 ê 基督耶穌；6 伊為 tiòh 眾人獻本身，做替贖 ê 價錢，有及時證明；7 因為 án-ni，我受設立做宣傳 ê，做使徒，用信用真實做外邦 ê 教師；我所講是真實無白賊。

**共同經課-4 馬太福音六章二十五節~三十三節**

25 所以我 kā lín 講，莫得掛慮 lín ê 性命 beh 食甚麼，beh lim 甚麼，á 是 lín ê 身軀 beh 穿甚麼。Lín ê 性命 kiám 無 khah 大 tī 米糧，也 lín ê 身軀 kiám 無 khah 大 tī 衣裳 mah？26 試看天中 ê 飛鳥，無種作，無收成，無積聚 tī 粟倉，lín ê 天父也 teh 飼 in。Lín kiám 無比 hiah-ê khah 貴氣 mah？27 Lín 甚麼人會用掛慮 hō 性命 khah 長一刻久？28 啥事為 tiòh 衣裳掛慮 ah？試想山裡 ê 百合花，怎樣大叢；in 無 tiòh 磨，無紡績(cheh)；29 若是我 kā lín 講，當所羅門極 hâng-ngó ê 時，伊所穿 ê m̄ 值 tiòh chit 號花 ê 一蕊。30 Ta<sup>n</sup> 山裡 ê 草，今 á 日 tī-teh，明 á 日 hiat tī 火爐，上帝 hō 伊穿到 án-ni，何況 lín，小信 ê 人 ah？31 所以莫得掛慮講，阮 beh 食甚麼？Beh lim 甚麼？Beh 穿甚麼？32 因為 chiah-ê lóng 是外邦人所求 ê；lín ê 天父也知 chiah-ê lóng 是 lín 欠用 ê。33 獨獨事先求伊 ê 國 kap 伊 ê 義，就 chiah-ê 物 lóng beh 續 hō lín。